

## Puteri Gunung Ledang

Oleh Wan Noorli Razali

Disangka mitos anggapan semata  
Sedangkan wujud di alam nyata  
Raden Gumilah empunya nama  
Tinggi dan mulia akan keturunannya

Jawa Tengah tempat asal  
Ayahanda Sultan Demak pertama  
Sultan Alam Fatah Al-Akhbar  
Siti Murtasimah nama ibunda

Cucu Maulana Ahmad Rahmatullah  
Juang jiwa kerana Allah  
Bumi Melayu dan Nusantara  
Tetap dipertahankan seluruh jiwa

Antara nyata dan nukilan sastera  
Biar apapun yang dikisahkan  
Nilai didikan tetap menjadi harta  
Sepanjang zaman menjadi tauladan

Tun Mamat mahupun Hang Tuah  
Untuk ke puncak tetap melangkah  
Menyampaikan hajat baginda Sultan  
Puteri di Gunung mahu diperisterikan

Di tengah taman penuh rimbunan  
Kedengaran merdu nyanyian gurindam  
Muncul si tua merenung tajam  
Dalam resah hajat disampaikan

Pada pinangan syarat diletak  
Bukan terang bibir menolak  
Adat Melayu hikmah dan adab  
Tiap alasan pasti bersebab

Tujuh dulang nyamuk dan hama  
Tanda tergadai hati jelata  
Tujuh tempayan air mata dara  
Lambang si gadis yang penuh sengsara

Semangkuk darah putera tersayang  
Ingatan pada tanggungjawab nan menghilang  
Bukan kerana kata tidak dikota  
Ditolak kezaliman hawa semata

Dengan halus memberi erti  
Bukti tinggi budi sang puteri  
Biar lisan mahupun fakta kajian  
Nilai murni tetap dijadikan pedoman

